



TNChief Minister-i kinü tanurtem

atema Gold ring scheme tenzüksütsü

Asian Games: S Korean hockey team

atema N Korean anthem temloktsü

Education Conclave 2026 nung North East nunger shisalemsateper

Dimapur, September 18, 2026 (TYO): Nagaland nung tanü nungi anogo ananü Education Conclave 2026 tenzükogo.

Hokolbarnü JP Park, Naga United Village Chümoukedima nung 'Implementation of NEP 2020: Vision, Challenges & Opportunities for the north eastern states' omen nung iba sentong tenzük. Iba sentong nung North Eastern region nungi policymakers, educators aser administrators adenshia shilemagir.

"Asenoki mangdang tajung ka renemtsü aser inyaksangshia aotsü lenmang yanglutsü atema adenshiogo. NEP 2020 takok ngua inyaksü atema asenok policy ka renemtsü aser shisatsü lemsateptsü atema aruogo" ta Higher Education & Tourism Minister Temjen Imna Along-i ashi.

"Tanü tayongzükba agi sünger aliba lima ka nung degrees ajanga mapa mangur. Nenoki shisaliok sayuba ajanga koba tashi kongshir aser kechi adoker ta asüngdang. Asenoki kanga arokaroka shisadangtsüla" ta pai ashi.

"Nagaland nung alir 98% tashi Khristan yimsü sülen anidaker aser kasaji Mizoram aser Meghalaya nunga lir. Asen universities nung Christian studies dendaktsü nung koda? Ibaji arokaroka shisadangba masü na? Muslim universities aika nung Islamic studies lir anungji Nagaland, Mizoram mesüra Northeast nung Christian studies tenzük nung koda? Asenoka iba India linük nung sensotem masü



na?" ta Imna Along-i asüngdang.

"Linük nung küm ti tashi Madrasa studies indang jembia arur. Iba ajanga linük yangerba nung kongshi asü mekongshi? Iba linük nung tanga tamangba yimsütema curriculum nung adentsüla. Ni tenla ki mesüra masjid mesüra mandir atema masü saka curriculum atema jembir" ta paisa ashi.

Minister Along-isa Chief Minister Neiphiu Rio ajanga yokba shidi zünga metetdaksüdang "Education Conclave ajanga olemtep tajung alitsü, tebilemba lemsateptsü aser ajangshia arubatem ashitsü sabang ka agütsür. Iba ajanga education sector nung maongkatem aser tayongzükbatem lemsateptsü" ta ashi.

Iba mungdang nung asenok indang educational ecosystem tashi aittsü atema shisatsü angutsü aser asen lanurtem nem knowledge, skills, values, aser confidence agütsüba nung yaritsü ta CM Rio-isa ashi.

"NEP 2020 ya education

policy ka dang masü saka asenoki shisaliok atema bilemba nung temelenshi ka lir. kaketshirtemi pei oshi, sobaliba aser inyaksangshi den sendaktepa alitsüla aser kasa mapang nung parnoki iba putu tasen nung artificial intelligence, digital technology, research, innovation, entrepreneurship, aser skills angazüksüla. Iba ya Northeast atema maongka tulu ka lir" ta Minister for Panchayats, Higher Education & GA Tripura Kishor Barman-i ashi.

"Northeast India ya India nung talangka pilar aliba kinük ka masü. Northeast India ya India asoshi tongtipang tashi ka lir, shisatsü, sobaliba, purapitetba aser human resources nung tashi tuluka lir. Asen teraji asen li nung teti yanga alitsü saka asen mangdangtemji alima dak rangloksüla" ta pai ashi.

"Asenok ajaki mangdang ka, mission ka, Northeast nung lanuputu atema mapa ka aser 2047 tashi nung developed India

atema külemi inyakdi" ta Barman-isa ashi.

"North East Council (NEC) kübok north east Education Minister tem senden anaben ali nung ajungtsü. Iba ajanga stat ti nungi scheme mashi ka atema joint submissions agütsütetsü aser asen nüngdak peritetsü" ta Mizoram nungi School Education Higher & Tech. Education, IT Minister Dr. Vanlalhlana-i ashi.

"Asenoki NEP, RTE maparen tenzükogo saka item inyakyim teimbaka plain areas atema renemba lir. Asenok hilly areas asoshi index balaka alitsüla, Northeastern states asoshi balaka alitsüla. Ano asenok asoshi hill area construction norms balaka latettsüla kechiyong centre sorkar nungi funds lemezükba ajanga school tajung yanglutsü kanga tasak lir" ta pai ashi.

"State ti shia nung sorkar school tem nung tazünger mali akümer, enrolment lemezükba dang nungibo sorkar school nem lemezükba teimba lir. Manipur nung

school tem nungi sorkar school 60% shi lir saka enrolment bo 31% dang lir" ta Dr. Vanlalhlana-isa ashi.

Nagaland nunga schools ajak nungi 80% ji sorkar school tem lir saka enrolment bo 33% dang lir. Mizoram nunga iba amaji dang lir anungji state 8 nung medemdangdang 6 nungbo government education enrolment majung lir ta paisa metetdaksü.

"NEP ya skill aser knowledge sendaktepba lir anungji university temi shisatsü den skill sendakteptsü atema kanga merangtsüla, kechiyong shisatsü kijai dangbo mapa inyaka moutettsü" ta Assam Education Minister Dr Ranoj Pegu-ia ashi.

Putu 21 buba nung skills tetezüji IT literacy, media literacy aser technology literacy. Nisung ka commerce, humanities, commerce, medical science kaketshir asütsü akok saka AI kanga nüngdaker ta pai ashi.

MLA & Advisor to HME

Arunachal Pradesh Mutchu Mithi-

ia tanü education sector nung

aibellentem ajanga tarutsü nung

kanga mejungi kongshitsü ta ashi.

Nagaland University nung Vice-Chancellor Jagadish K. Patnaik-i jembidang National Education Policy (NEP) 2020 den putepa Northeast nung contextual aser inclusive educational transformation nüngdaker ta ashi.

"Northeast ya contextual, inclusive, & knowledge-driven educational transformation atema model akümtsü koka lir" ta Dr. Patnaik-i

Themreichon Leisan-i züluba 'Homesick for another world' sayaogo



Abelen nungi achichi: Dr. Kekhrielhoulie Yhome, Advisor, School Education & SCERT, kaket zülur Themreichon Leisan aser Publisher Vishu Rita Krocha nungertem "Homesick for another world" kaket sayaba mapang tangokba noksa ka yangi angur.

Dimapur, Rongjui/Sept. 18 (TYO): PenThrill-i adokba kaket 125 buba, "Homesick for another world" sayaogo. Iba kaket ya Themreichon Leisan-i zülü aser September 17 nikongdang Nagaland State Guest House, New Delhi nung Advisor, School Education & SCERT, Dr. Kekhrielhoulie Yhome-i sayaja liasü.

Tribal nisungtem lunük telungzük nunga tesem balala nung prokshia oa aliba mapang ka nung lanurtem shisaliok aser mapa atema yimti tem bushia prokshir aser ki menungraba aitdaksür, ta Dr.

Kekhrielhoulie Yhome-i ashi. Pai ashiba agi, "iba poetry collection ya sobaliba mamatetba indang genre tasen ka lir koba ajanga taküm nung ajangshiba aser pei sasa bilemba tem lemsateper."

Iba ama yimya nung züluba ya yakta aintsü imlar, ta pai ashi. Kaket zülur Themreichon Leisan ya Ukhrul, Manipur nungi lir aser kaket azünger tajung, shibai book reviews zülutsü jangrar la metek aliba agi ajungmesoa otsü yanglur.

Leisan ya University of Delhi nungi English Literature nung Master's Degree ngua lir

aser taoba mapang tesayur inyaka liasü aser tang New Delhi nung alir aser yangji mapa inyaker.

Ola madoki ajungmesoba aika aliba ajanga iba kaket ya zülutet aser ibai kü kisünger masü saka lai la dak amang metenzük dang la dak tamang akaba nisungtem den sensaksemba aser ajungmesoba ajanga kaket ya zülü, ta lai ashi.

Kaket menünger Vishu Rita Krocha-i iba kaket ya PenThrill-i adokba kaket 125 buba aser Manipur nungi züluba kaket pongu buba alitsü, ta ashi.

Nagaland Angh-i Kohima Smart City Projects asadang



Dimapur, Rongjui/Sept. 18 (TYO): Nagaland Angh Nand Kishore Yadav-i September 18, 2026 nü Lok Bhavan, Kohima nung Kohima Smart City Development Limited (KSCDL) ketdangsürtem den senden ka mena liasü.

Iba senden nung ketdangsür temi Kohima Smart City Mission kübok projects balala inyakba nung terenlok aliba, takok anguba aser tang jenjangtem tejangja agi lemsatepa liasü.

KSCDL ketdangsür temi ashiba agi, Kohima ya Smart Cities Mission kübok September 20, 2016 nung shim aser iba Smart Cities Mission ya March 31, 2026 nung tembangogo.

Iba Mission kübok sanction asüba projects 34 renemogo aser iba den ano projects talila trok renemog, ta ketdangsür temi ashi.

Ketdangsür temi Angh dang KSCDL kübok tongtipang

projects tem aser urban infrastructure development mapa inyakba indang lemsatepdang, Kohima City Centre, hotel building, commercial complex, multi level car parking facilities, Mini Sports Complex, Kohima Local Ground, Capital Cultural Hall, community halls, accessible footpaths aser tanga nüburtemi amshiba tesemtem yangluba indang lemsatepa liasü.

Item projects yagi urban amenities, mobility, smart services, public spaces aser city centre infrastructure tem awajema liasü.

Iba senden nung Integrated Command and Control Centre (ICCC) indaga awajema liasü, koba renema commission süogo. Tang ICCC yagi 24x7 CCTV surveillance, traffic management, ANPR-based vehicle monitoring, public safety and security, police coordination aser investigation-related

surveillance support nung yariteper.

Kohima tesem 80 nung CCTV surveillance inoka lir aser November 2025 nungi September 2026 tashinung bushisüngdangba nung ICCC surveillance data agi yariba nung ken o akokba shilem 76.47 lir ta ashi.

Ano Smart Cities Mission tembangba sülen tarutsü nung KSCDL indang institutional arrangement atema Angh den lemsatepa liasü.

Revenue adokdaksüba urban assets aika iba Mission kübok amenoka tang tashi shidak amshir, aser item services nungi senotsü aruba ya ano public amenities aser services tali yaritsü tebilemba lir, ta Angh dang ashi.

SPV ya iba Mission tembangaka ano maneni inyaksü state sorkari asadangba mapang lir, ta parnokisa ashi.

International Peace Poster Contest 2026 nung shilem agitsü jaoker

Dimapur, Rongjui/Sept. 18 (TYO): International Lions Club of Kohima ajanga Kohima nung aliba kaket rejutem Lions International Peace Poster Contest 2026 nung shilem agitsü jaokogo, koba October 3, 2026 nü Rüzühkhrie Government Higher Secondary School, Kohima nung agitsü sentong lir.

Iba tetoktepba ya tanurtem November 15, 2026 tashinung arishi küm 11, 12 mesüra 13 alirtem asoshi lir. Kaket reju shia-i kaketshir ka-ka iba tetoktepba atema shimtsü akok. Shilem agirtem nem "Harmony in Humanity" omen nung ajemdaker poster ka yangludaksütsü.

Iba tetoktepba yagi tanurtem art ajanga yimjung angatetba aser mangdang lemsateptsü maongka agütsütsü.

2026-27 omen ajanga lanurtem dang sobaliba aser jenjang balala nungi nisungtem yimjung nung külemi alitsü atema bilema aliba lima ka yanglutsü ajungmesor. Iba den külemi akhümtsübutep, temeim sayuba, tangatetep, taremsüktep aser amalitep ajungkettsü atema ayongzükur.

Iba tetoktepba ajanga tanurtemi anogoshi taküm nung yimjung tongtipang indang shisadangsü aser parnok shisatsü amshia temeim, akhümtsübu aser tesünap aliba yimya ajungkettsü atema ajungmesotsü meranger, ta International Lions Club, Kohima ajanga ashi.

Local level nung takok angur nem Club-i senpet sen 10,000 den takok anguba sempet aser kulizüing kaket tem agütsütsü.

Local contest sülen takok anguba poster ya ano district aser international levels atema yoktsü. International level nung International Grand Prize Winner ya iba sempet agütsüba tesemi aoba den sen US\$5,000 den sempet angutsü. Iba den ano Merit Award Winners 23 nem sen US\$500 den takok anguba kulizüing kaket agütsütsü.

Iba sentong nung shilem agitsü jangra aliba kaket reju temi Lion Max Menuose-O, Secretary & Contest Chairperson, Lions Club of Kohima den mobile numbers 7085774704 / 9077707345 ajanga tongteprateptsü akok.

Mokokchung DPDB-i Changtongya nung Fire Station yanglutsü melaogo

Dimapur, Rongjui/Sept. 18 (TYO): Ita shia amenba Mokokchung District Planning and Development Board (DPDB) senden DPDB Chairman aser Minister, Rural Development & SIRD, Metsübo Jamir lenisüba kübok September 18, 20



September 18, 2026 nü Hyderabad nung Telangana Chief Minister, Revanth Reddy-i UK nungi business schools & universities ketdangsertem telok ka ajurudang tangokba noksa nung angur.

TN Chief Minister-i kinü tanurtem atema Gold ring scheme tenzüksütsü

Chennai, September 18 (Agencies): September 28, 2026 nü Tamil Nadu Chief Minister, C Joseph Vijay-i kinü tanurtem atema 'One-gram gold ring' scheme tenzüksütsü, ta Hokolbarnü state sorkari metetdaksü.

Iba scheme kübok mezüngbuba shilem nung kinü tanurtem nem teyari agütsütsü atema sorkari gold rings lakh 1.28 alizükogo, aser gold rings ji state sorkar hospital nung asoba tanur shia nem agütsütsü.

Hon agi yangluba küri shia nungi serial number balala alitsü, ta sorkari metetdaksü.

One-gram gold ring scheme kübok tajangzük angutsü atema temsüa alitsü asoshi kinü tanur tetsüji Tamil Nadu nung alir ka asütsüla, PICME (Pregnancy

and Infant Cohort Monitoring and Evaluation) kübok register süa alir asütsüla aser RCH (Reproductive and Child Health ID) identity card alitsüla.

Centre 107 nung Gold rings ji taküm June 22 (Chief Minister Vijay asoba anogo) nungi tenzüka scheme tenzüka anogo (September 28) tashi nung sorkar hospital tem nung asoba kinü tanurtem nem agütsütsü.

Hospital nungi discharge asüba mapang nung gold rings ji agütsütsü.

Iba scheme ya nüburtemi sorkar hospital tem dak tamang katetba ajungkettsütsü atema dang masü saka sorkar hospital tem nung tanur junga sotsüba ajungkettsütsü nükjidong nung lir, ta state sorkari metetdaksü.

Taoba Tamil Nadu assembly

election nung Vijay-i aniba TVK party-i Thaimaaman Thanga Mothiram Thittam (Maternal Uncle Gold Ring Scheme) ya nangzüka liasü.

Chief minister leniba nung Secretariat nung senden ka amenba sülen iba scheme tenzüksü anogo sangdong. Iba senden nungi Health Minister KG Arunraj, Chief Secretary M Saikumar, DGP Mahesh Kumar Aggarwal aser tongti ketdangertem aika liasü.

Tamil Nadu nung küm shia tanur lakh 7.80 shi asor, aser iba nungjagi tanur shilem 99 bo hospital nung asor (National Family Health Survey-6 (NFHS-6).

Sorkar hospital nung küm shia tanur lakh 4.20 (shilem 53) asor.

Odisha nung district 20 nem yipru lendong tekümdangtsü metetdaksü

Bhubaneswar, Rongjui/September 18 (Agencies): Odisha state sorkari district 20 dang Bay of Bengal tzüym nung low pressure area ka tentetogo, aser ibaji yipru tesashiba akümtsüa akok, ta tekümdangtsü osang ka metetdaksüogo, ta Hokolbarnü Revenue and Disaster Management Minister, Suresh Pujari-i metetdaksü.

India Meteorological Department (IMD)-i, north Thailand nung upper-air cyclonic circulation ka Hokolbar aonung tashi nung north Andaman Sea atongtsü aser Honibar aonung tashi nungbo iba region nung low-pressure area ka tentettsü,

ta metetdaksü.

Meteorological Centre, Bhubaneswar nung Director Manorama Mohanty-i, "Iba sülen iba yipruji tesashiba küma taruba anogo 3-4 tsüingda Odisha-north Andhra Pradesh tzüymkümlen atongtsü," ta metetdaksü.

Manorama Mohanty-i, IMD scientist temi iba ya junga mita reprangdar, aser maneni mapang shia osang metetdaksütsü, ta ashi.

Tang tashi nungbo weather office-i iba yipru ya cyclonic yipru akümtsü asü masüar memetetdaksü, ta lai ashi.

"Iba yipru ya tesashiba kümra IMD-i mapang tetemsü

nung nüburtem nem osang metetdaksütsü. Ajisüaka September 22 nungi tenzüka south Odisha nung tzünglu kanga arutsü," ta Mohanty-i metetdaksü.

Minister Pujari-i, iba tensa koktettsüsa sorkar renema dang lir; district 20 nem yellow alert osang metetdaksüogo, ta ashi.

IMD-i taruba ghonda 24 tsüingda district 15 nung tzünglu kanga aruba den külemi tsüingi aitsü aser mopung kanga sashia aontsü, ta metetdaksüogo.

IMD-isa September 19 nungi tenzüka September 25 tashi district aika nung tzünglu kanga sashia arutsü, ta metetdaksüogo.

Nandigram by election nung Congress candidate, Milan Pradhan puogo

New Delhi, September 18 (Agencies): October 6 nü West Bengal nung Nandigram Assembly by election agitsü lia Congress candidate Milan Pradhan Hokolbarnü puogo.

Taoba mapang West Bengal Chief minister Mamata Banerjee-i lai aniba teloki Congress candidate pusemtsü, ta sangdongba sülen ghonda ishika tsüingda Congress candidate apu.

Tamalen nisung tepsetba ken o ka dak sendakba nung Pradhan apu.

Hokolbarnü osangbenertem senden ka nung Mamata Banerjee-i lai aniba teloki Nandigram by election nung Pradhan pusemtsü, ta sangdonga liasü.

Mamata Banerjee-i aniba telok Trinamool Congress (TMC) nungi candidate, Sanchita Pradhan Dey-i tenüng agienba sülen Mamata-i Congress candidate yaritsü sangdong.

Congress party otongdar, Mita Chakraborty-ibo, Mamata Banerjee-i Congress yaritsü telemtetba agiba ajanga Congress candidate apu, ta metetdaksü. "Tanü taoba mapang chief minister Mamata Banerjee-i Milan Pradhan yaritsü sangdong. Ghonda ishika tsüingda pa puogo," ta

Chakraborty-i metetdaksü.

Laisa, "Nenoki amokmerenra aser opposition nem maongka agütsütsü memelungra nenoki iba linük nung autocracy asü democracy aginer? Iba ama amokmeren ajanga nenoki Congress mesüra opposition nokdangtetsü ta bilema lira iba khenyongi tai," ta ashi.

Hokolbarnü TMC candidate Sanchita Pradhan Dey-i nomination agiena liasü. Lai West Bengal Chief Minister Suwendu Adhikari ajuruba sülen nomination agien, ta osang angazüker.

Iba sülen Mamata Banerjee-i lar teloki Nandigram by election nung Congress yaritsü aser Assam kübok Nagaon Lok Sabha by election nunga Congress yaritsü, ta sangdongogo.

Nandigram by election atema Congress-i Milan Pradhan candidate shim, CPI-i Shanti Gopal Giri shim aser BJP-i Hasirani Rath toktepdaksütsü.

Suwendu Adhikari-i Nandigram menden toktsür Bhabanipur shimba ajanga iba menden azüingeta liasü. Taküm assembly election nung Suwendu-i iba menden nung Mamata Banerjee madak takok ngua liasü.

Pilgrimage scheme ajanga nisung lakh 5 ajangzükogo: Punjab minister

New Delhi, September 18 (Agencies): Punjab tourism minister Tarunpreet Singh Sond-i, state sorkar 'Mukh Mantri Tirath Yatra' scheme ajanga temeshi ainlen jajar nisung 5,10,807-i tajangzük ng



TIR YIMYIM YIMOBILEM (EDITORIAL)

DIMAPUR

KÜPTOKNÜ

RONGJUI 19, 2026

Centre-i MDR lemtet repringshitsüla

- P Tiamongba Aier

Centre sorkari October 15, 2026 nungi Unified Payments Interface (UPI) ajanga Rs 2,000 tema yokba atema merchant discount rate (MDR) 0.4% agitsü aser teimtibai Rs 300 tashi MDR agitsü osang metetdaksüogo. Külen, Rs 75,000 ser tema yokba atema Rs 300 flat charge agitsü aser ibaji talir dang nungi masü saka merchant dang nungi agitsü aser senji facilitating bank o payments interface tsünga lemsatsü. Ajisüaka, kijatem aser merchant tsünga senotsü terara yoktepbabo angati asütsü ta Centre-i shiogo. MDR ta asüba ya digital payments maparen inyaksü atema shishilembartem dang nungi agiba fee ka lir. Ajisüaka, Centre-i MDR agitsüba lemtet ya telok balala, Opposition aser public-i ashishiteper aser karibo American card companies yaritsü atema iba lemtet agiogo ta aitsür. UPI tiptema inyaka aoba nung senotsü aika endoker. UPI maparen atema küm ka nung Rs 20,000 crore shi endoker aser iba nung transaction processing, technical support aser fraud prevention maparen dena lir ta industry ajanga asadangtetba osang ka metetdaksüogo. 2025-26 tsünga UPI ajanga 24,000 crore transactions tema liasü aser 2024-25 tsünga UPI ajanga Rs 981 crore ashikülaka amshiba ataloka liasü. Item takoksa ya security metokmeperi masü saka fraud detection aser protection maparen asoshi senotsü teti nungdakba kuli lir. Centre-ibo consumers-i sen talila meindoktsü ta ashir saka tatem nungbo ibala khuret ya inyakyim tilala ajangasa consumer nemsä benlokja atemer. Reserve Bank of India (RBI)-i 2025-26 atema surplus dividend ama Rs 2.87 lakh crore agütsüogo ta Opposition-i ashir. Iba surplus ya general revenue nung aiter anungji UPI operations subsidise asüba nunga iba sen ya amshitsü lenmang sadema lir ta parnoki ashir. Rs 2000 tema totzü aliba atema Rs 5 UPI charge agiba nung tetendaksü ta petrol pump dealers-i metetdaksüogo. All India Petroleum Dealers Association (AIPDA)-i iba tebilemtsü lemsatepogo aser parnoki sorkar ketdangsürtem den merchant discount rate (MDR) inyakyim nung parnok madentsü jembidar. Külen, state aika nung petrol pump dealers-i UPI masü saka cash ajanga dang totzü ayoktsü ta amokmerenogo. Maneni, neighbourhood stores 150,000 tenüng nung All India Mobile Retailers Association (AIMRA)-ia sorkar dang company temi handset jenjang atuba agi 40% year-on-year drop ajurua aliba tebilemtsü lemsatepogo, anungji MDR agitsüba ya meyipa repringshiang ta parnoki shiogo. Ano, FMCG general trade industry body All India Consumer Products Distributors Federation (AICPDF)-ia sorkar dangi iba atema shidi ka zülutsü lemtetogo aser Retailers Association of India (RAI)-ia sorkar den jembitepdar. Anosa, tarutsü anogotem telok balalai pei pei khuret aser tebilemtsü lemsateptsü saka Centre sorkari iba lemtet ya magientsü ama merangmeranga noktaka lir anungji tatem nungbo tai maket consumer temisa MDR ta ajaba fee ji kolen ka nungi menoktsüsa akümtsü, kechiyong shishilembartemi parnok akoksabo shishilemba masütsü. Tang BJP-i aniba NDA sorkar ajanga mapa tajung ka inyaktetbaji digital public infrastructure ulushiba ya lir. Parnoki iba wadang nung temulung agüja merangba ajanga nübortemi UPI kanga bulua amshir. Tanü putu nung jila aser yimti nung alirtemi dang masü saka meta talangtiba pilaa orr aliba yimtsüng nung alir katiä GPay, PayTM, PhonePe, BHIM amala apps amshia senotsü yokteper aser iba ya kangasa tajung lir. Anungji Centre sorkari telok balala aser kijatemi ola adokba angashia senso ajak asoshi bilemja, kanga junga asadanger MDR fee ya magii kümshia Reserve Bank of India (RBI) ajanga surplus dividend agütsüba nungi agiteta UPI maparen nung amshitsü lenmang lir. Nagaland nunga shishilembar telok aika tenteta lir anungji parnoki linük kübok tangalen ola adokba amaji yabo majunga, onokia magizüker ta ashitsü tim. Linük ajunga dak kongshiba ken o tem atemabo asenokia atsüanema meli tangar denji liromedema aser pusema nungita ola adoktsüla.

OLEMSABANG

Mass Media - tetsürtem asoshi tajangzük asü takoksa?

Longchanaro Longchar

Noksa nung anguba aser asangsang nung anguba tetsünga tulu lir aser ibaji bendangtsü atema asenok shisatsü nungdaker. Tanü alima kangadang karaa ainba lima ka nung asenok alir ta bangbet süa jembiba asenoki meteta lir. Saka alima ainba den liromedema asen shisatsüja ainer asü masü?

Tanü putu nung joko TV aser telephone ajanga dang masü saka internet, cable/satellite TV aser mobile phone ajanga osangtsüsang agiteper, noksa lemsateper aser nungdakba tongtepratep ajak inyaker. Item amala "information technology" ya asenoki noktangtsü mesüra soita ayutsü makok aser technology-ji tajungba, tuluba, tekaraba aser tesashiba tang akümtsü. Iba ama alima meyipshishidaksütsü tashi aketba technology putu ka nung alidang asenok shisatsü aser tangatetba koba jenjang ka nung lir?

Asenoki metet, "information technology" ajanga "mass media" ya tesügmangtsü ka melenshidaksüogo. Mass media nung asenoki tajung tamajung ajak angutsü saka asenok dak tajung aser tamajung bendangtetsü shisatsü alitsü tim. Tia kar maka, anogoshia aben asenok liyonga aodang item mass media ya joko asenok taküm nung shilem ka aser asen temang nung tenüktelen ka ama kümadokogo. Ibayongji yimya sübaba ka ama asenoki joko mass media ajanga bener arutsüba tajangzük aser takoksa asadangtsü mebilemer.

Mass media tashi amshia shishilembartemi nübur mesüzüktsü tasa jenti amshir. Terebrangertem puadaksütsü aser parnok ket nungi sen mesütsü nükjidong nung shishilembartemi noksa tapu balala yanglua sayur. Noksa nung aiben tetsür tobur tajung süoshi junga masem sayuba asenoki angur. Ano TV, osangkaket aser magazine ajak nung tetsürtem mangsa ama sayuba asenoki angur. Item aiürtem ya asangsang nungbo tobur kanga tajungbo masü saka parnok noksa ya computer nung yanglushir (digitally manipulated) sayuba lir. Saka tetsür aikati item noksa nung adokba aiürtem ama renemtsü merangba asenoki angur. Ya kangadang tekümdangtsü ka lir kechiyong yamala mesükba ajanga tetsür ka tekolok shisatsü menentsür, loktiliba masüngteti küm daksür aser rongsenkettsünga nung tabok badaksür.

Küm 2007 nung American Physiological Association (APA) ajanga tebushidangba ka inyakba sülen tansütsü osang ka sangdonga lir. Mass media nung adokba tetsür noksa rebrangba ajanga tetsürchanutem shisatsü aser temang (emotional and physical health) raksatsür ta APA-i ngutetogo. Parnokisa ashiba agi, teintet tetsürtem dang nungi tetsürchanutem asoshi iba lendong ya anasaba lir.

Ano nungtugu kentenertemi ken atenba nung ojang tamajung inoka atenba aser ken noksa (music video) nung nüktabangta noksa ama azüabonga sayuba ajanga lanurtem tekolok shisatsü koda raksaja alitsü! Ano tanüasüng lanurtemi Korea nungeri yangluba noksa nung sayuba jilo koda sapua ayir, asenok ajaki meteta lir. Korea nunger ya mapa kangadang meranga inyakba kin ka lir aser noksa nung sayuba ama parnoki asangsang nung malir. Noksa nung sayuba ya parnok shishilembatsü tasa

Billy Graham'er semchir Graham Lynch Religious Freedom Ambassador shim



Jane "Cissie" Graham Lynch aser tebu Franklin Graham na noksa nung angur.

September 18, 2026: US Tir Donald Trump-i nungtugu sayutsünger asür Billy Graham'er semchir aser Samaritan's Purse Tir Franklin Graham'er jala, Jane "Cissie" Graham Lynch International Religious Freedom atema United States Ambassador at Large shimogo.

Lynch ya Samaritan's Purse aser Billy Graham Evangelistic Association nung Communication Director inyaker.

Lynch-i, "Iba ya ni asoshi maongka aser akhümket tuluka lir," ta ashi.

Lai X ajanga, "Senate-i agizükra ni tajungtiba nung inyaktettsü aser meimchir temeden kümzüka ayutsü atema ni maongka ajak agiteta inyaksü atema sarasademjang. Tang alima nung ano nisung aikati yimsü temeden menguteti lidar," ta metetdaksü.

Tebu Franklin Graham-ia social media ajanga, "Tir Donald J. Trump-i ozü jala Cissie Graham Lynch International Religious Freedom atema United States Ambassador at Large inyaksü shimogo. Iba menden atema Cissie kanga temsüa lir. Lai alima tesem balala sema senzüogo aser küm aika lai iba tebilemtsü atema inyaker," ta metetdaksü.

Franklin Graham-isa, "Tanü alima nung yimsü temeden dak sendakba tebilemtsü ya lai junga angateta lir. Senate-i dang agizükra lai iba office ajanga yimsü temeden atema inyaksü. La ajanga ni kanga nüma atanger. La nem shisatsü aser tashi agüjang ta sarasademtsü ni mepishir," ta metetdaksü.

Hombarnü Senate dangi yokba nominations list nungji Lynch (Jane Lynch) tenüng densema lir.

United States Ambassador

at Large for International Religious Freedom ya mezüng 1998 küm Congress-i tenteta liasü. State Department nung International Religious Freedom office nung tongtiji Ambassador lir.

Yimsü temeden dak sendakba nung US Tir aser secretary of state atema principal adviser ji

United States Ambassador at Large lir.

Lynch ya kaketzülur ka aser speaker ka lir. La ya "Fearless" podcast ketdangser aser 'Stand Steady: Fearless Faith in a Compromising Culture' kaketzülura lir. Iba kaketzülur ita sayatsü.

Taküm US küm 250 ajungbamong nungtem nung ayongzükba 'Rededicate 250' sentong nung lai o jembia liasü aser 2020 Republican National Convention nunga o jembia liasü.

ANO GO ABEN TSÜNGREM DEN

Tsüngrem meyong temaitsü ajen

"Aser Tsüngrem Tanela Temeshi, shiba dak tekümzüksüba anogo asoshi nenok temaitsü ajen, pa tejashitaksü." Efesa 4:30.

Tsüngremi asenok meyipa alizük, aser tasen yanglushiba ajanga temaitsü ajen. Khrista mapa jungkai adokdaksütsü asoshi Tanela Temeshi-i maneni inyaker.

Kibur akümba aser kümzükbba mapa anaji Tsüngrem mapa aser temaitsü ajena asen nungdak ajak temulung südaktsür. Kaketzülur nung mesüra oset nung asen tenüng zülua temaitsü ajenba agi shiba meyong aji metetter. Tsüngremi asenok dak pa tenüng Tanela Temeshi ajanga zülü. Pa signatureji Khrista jakla Tanela Temeshi ajanga renlok daksüba lir. Tangari asenok dak Khrista anguba jagi alimai asenok pa meyong ta metetter. Aseni koda alir aser anogoshia asen temang amshibaji sabang ka lir, kong Khrista angur.

Temaitsü ajenba tanabuba nükjidongji jenokdak. Paul mapang nung kaketzülur lung temenatempa temerang agi menatempa amshi. Temenatempa temerangji meraksara kaketzülur lapoktsü makok. Tanela Temeshi akaba jagi asenok kodanga Tsüngrem nungi pilaa aotsü makok ta kuli asür. Khrista ajanga Tanela Temeshi-i asenok Tsüngrem dak lidaktsür, kodanga Khrista temeim nungi pilatsü makok. Idangji asenok alangzüktsü, keni melenshitsu aser Khrista mesüka alitsü.

Cuba nung Methodist sentong ka nung nisung 300 dak tali bapti



Cuba nung 'Tabernáculo de Avivamiento (Revival Tabernacle)' sentong nung adenertem tangokba noksa nung angur.

September 18, 2026: Cuba linük nung Guantánamo District nung aliba Methodist Arogo sentong ka nung nisung 300 dak tali baptiogo, ta osang ka ajanga metetdaksü.

Bishop Ricardo Pereira aser Superintendent Roelvis Gañza na leniba nung agiba sentong 'Tabernáculo de Avivamiento (Revival Tabernacle)' nungji kibong noklang aika dena liasü.

Tesüiba küm ter tsüngda Cuba nung Methodist Church ministries aser züngsemtem kanga ainer. Cuba nung loktiliba aser rongsenkettzüng tsütsü nüburtemi tayongzükba jenti ajangshiba mapang ka

nung evangelical Arogo temi nüburtem nungita yariba den külemi nüburtem nem teimla agütsür.

Sentong ayongzükertemi, iba sentong ya tanela telongjem mapang ka liasü, aser nisung 300 dak temai Khrista nem bendanga agüja baptiogo, ta metetdaksü.

Arogo nung lenirtemi Khrista osangtajung ajanga kija taküm aser kibongtem nung temelenshi tulu adokdaksüteter ta jembia liasü. Lenirtemisa, baptiba ajanga temelenshi tulu adoker; tzü telung nung rembangba mapang nung tejenba taküm toktsür, ta metetdaksü.



Amazing Grace Theological Seminary, Seithekima -A nung September 18, 2026 nikongdang parnok "Literary Day cum Cultural Night" sentong nung shilem agiba noksa nung angur. Iba college nung C. Th, Diploma, B. Th and M. Div courses agütsür. Iba college ya ATA aser NECU nung züngoka lir. Iba college nung Myanmar, Sikkim aser tanga state-tem nungia arua azünger. Tanü iba sentong nung Laishirtemi sobaliba sentong tapu balala nung kanga junga shilem agia liasü. Iba sentong nung Tir Yimiyim Yimozülur, K. Temjen Jamiri Laishirtem den Tsüngrem mapa ya Arogo nung dang masü saka mapa tapu balala inyaka inyaksü ayongzük aser Hope Academy nung Music Coordinator, Wb. Kümzükb T Jamiri ken tajung tena sentong lemladaksü. (Chümoukedima, Seithekima- A, September 18, 2026).

AO OSHI ANGAZÜKDAK: TANÜ ANGAZÜKTSÜBA OJANG



Tir Yimyim

Hadiangdi

(adj) kanga tulu (very big)

* Alu lenmang nung shiti hadiangdi ka nokdaka liasü.

Hakli

(adj) ola madoki tezü atsüba, konem jakla (moody, grumpy)

* Nisung karbo kecha mashiyaonga hakli adoka dang alir.

OLONG PAITEP # 7654

1		2				3		4		5
				6						
	7		8							
9					10			11	12	
			13			14	15			
16					17			18		
				19		20				
21		22								23
24										
							25			

TIPIEN

1. Tebendang mali kürakrak

- (4)

6. Ajak agutsu

- (7)

7. Tazüing

- (4)

9. Tasen ka adok

- (6)

11. _ _ _ daker

- (3)

13. Ataba

- (5)

16. Tzüinglu den tsüker

- (3)

17. Tar matur

- (6)

20. _ _ _ _ rtem

- (4)

24. Tenüing kasa

- (7)

25. Kilem nung atonger

- (4)

LANGTSÜLEN

1. _ _ _ nendong

- (3)

2. Wai

- (5)

3. O temulung

- (4)

4. Nütsü tebuba

- (3)

5. Tesangwa

- (3)

6. Apitet

- (5)

7. Anepdaksur

- (4)

8. Anogo semer ka

- (3)

10. _ _ _ long

- (3)

12. Temba _ _ _ _

- (4)

14. Teka amtep _ _

- (5)

15. _ _ _ k

- (3)

18. Mejanga onü

- (5)

19. Talak techira

- (4)

21. Maneni

- (3)

22. Achiba sungo tou ka

- (3)

23. _ _ _ ng

- (3)

OLONG PAITEP # 7653 TELANGZÜBA

TIPIEN :

1. Telok, 4. Aluru, 6. Ozüing, 8. Emk,

9. Kin, 10. Teti, 12. Süir, 13. Jen, 14.

Ola, 16. Talak, 17. Mazük.

LANGTSÜNGLEN :

1. Tenükjang, 2. Luden, 3. Kioktsü,

2. Lenti, 7. Tajangzük, 11. Teronem,

12. Sempa, 13. Jahaz.

NAI-A YA METETTER MA



Madhya Pradesh kübok Ujjain nung Prime Minister Narendra Modi arishi küm 76 ajungba benjung amungdang alima otsü tasen ka yangluogo. Iba 'Ashirwad ka Diya' sentong ya aonung 7:00 ako nung tenzük aser tesem balala nung volunteers-i 33.27 lakh diyas tsüklokba ajanga otsü tasen yanglutet.

Tetsü o kinü tanur na asüba atema mozü ki shibangtsü



Imphal, September 18, 2026

(Agencies): Arishi küm 30 tain tetsü aser kinü tanur ka Manipur kübok Kakching district nungi Thoubal District Hospital-i anir aodang asü.

Tanur tetsü ya Sugnu nung alir Khaidem Ongbi Malemnganbi Devi liasü ta jangjaogo.

Devi-i sub-district hospital nung tanur aso saka la blood pressure ajungbena ajema akümba agi doctors aser nurses-i la Thoubal facility-i anir aotsü ashi. Ajisi

Nigeria paramilitary ket nung miner 37 asüba sülen longkak ait

Minna, Rongjui/Sept. 18 (Agencies): Ozüng alema hon atur ta temulung melemi bilemba tesem ka meita oa apuba nisung 37 paramilitary force ket nung sür aliba ngutetba sülen central Nigeria nung timti ka nung Brehostibar aonung nungi nüburtemi longkak aita liasü.

Nigeria Security and Civil Defence Corps (NSCDC) ket nung tasü ngutetba nisung 33 temang Niger State yimtiba Minna nung General Hospital indang ward ka nung Brehostibarnü yua liasü.

State ketdangsür temi pua alir nisung 37 süogo, ta Hokulbarnü ashi.

Parnok ya Minna anüolen Wushishi-Lukoto area nung temulung melemi hon atur ta bilema September 15 nungi 16 tashi meita aoba mapang apu, ta NSCDC ajanga ashi. Mezüngbo tashidak kar ajanga parnok ya asü südi ta shia liasü saka mapang tatsüka lir asüba mejangja aser medical examinations ajanga ang jangjatsü ta ashi.

Iba bushisüngdang junga metembang tashi Niger State indang NSCDC commandant, Suberu Siyaka Aniviye mapa nungi anenja alitsü Interior Minister Olubunmi Tunji-Ojo-i totuyuba agütsüogo.

"Iba tatalokba ya tia maka, ajisüaka jung-junga

bushisüngdang asütsü aser commandant shiba kübok iba ya atalok, pa mapa nungi anenja alitsü," ta Interior Ministry ajanga sangdong ka nung ashi.

Pua alir ka tetsü Shafa'atu Suleiman-i Brehostibarnü mozüki kima osangbener dang ashiba agi, lai lar jabaso Abdullahi ya parnok pua aliba tesem nung lia semdang aser iba mapang lar jabaso ya NSCDC cell ka nung tangartem den nemtena yua liasü aser mapang tatsüka lir pa süogo ta angazük.

Ketdangsür temi kinunger tem pua alir nem chiyongtsü agütsüdaktsütsü memela aser parnok chioktsü atema sen 100,000 naira (\$75) meshia liasü, ta lai ashi.

"Ibai tim masü. Onoki tatok magütsütsü."

Item nisungtem asüba mechi tejashi nung Minna nung Brehostibar aonung longkak ait tenzüka lanurtemi ochi obendang agütsütsü akhang. Longkak aiter kari gari tem raksatsü.

Hokulbarnep yimti süngjema kumer liasü, saka Minna tesem balala nung security forces aika yoka lir.

Nigeria nung temelaba makai hon atuba tesem meyirijang aika azüoktsü küm aika meranga arur. Ozüng alema hon atuba ajanga libajen raksar aser sorkar revenue akoksar, ta ketdangsür temi ashir.

Trump administration-i Saudi Arabia dang F-35 jets ayoktsü melar

Washington, Rongjui/Sept. 18 (Agencies): United States Tir Donald Trump indang administration-i ozüng yanglurtem dang Saudi Arabia dang sen \$24.3bn shi agi F-35 fighter jets 48 ayoktsü atema lenmang sadema lapokjang ta shiogo.

"Tang ayoktsü jembiba yagi United States indang foreign policy aser national security nükjidong nung yaria non-NATO ally tongtipang linük ka indang security tajungba kumdaktsütsü, kechiaser Gulf region nung yimten tashi ita alitsü aser rongsenketzüng terenlok atema par tashi nüngdaker," ta State Department-i Brehostibarnü sangdong ka nung ashi.

US ket nung aliba fighter aircraft tajungtiba ya ayokba ajanga region nung tsükchir dang Israel mitkar tashi tuluba asütsü US policy nung mokongshitsü, ta administration-i ashi.

Yemen nung aliba Houthis temi Marib yimti nung Saudi F-15 fighter jet ka khazüka yokogo ta Bodhbarnü ashiba sülen iba sangdong ya agütsür. Marib ya Houthi teloki Saudi-i yariba Yemen sorkar indang mitkartem den raraba nung tongtipang yimti ka lir.

Iba telok yagi video ka lemsatepba nung par telok

züngsemtem yimti nung US-i yangluba F-15 fighter jet ka nung mi adoka aliba anasa nokdaka liasü aser iba tayimtsü nung Saudi Arabia mait्सü keta liasü.

Houthis temi iba tayimtsü ya parnok i yangluba surface-to-air missile kati khazüka yok ta ashir, koba ajanga iba teloki raratsü asoshi tashi nung temelenshi tulu aruba alitsü. Tang tashi Uemen nung anünglen Saudi Arabia mitkar tashi tuluba ama lia aru, aser kidanger yimtsüngtem nung tayimtsü amshia amakba nunga par tashi nung kanga metaloka liasü.

Saudi Arabia aser Houthis tsüngta tesashiba raraba nung Brehostibarnü tanur asem densema nisung pongu tepsetogo ta ashir.

Saudi Arabia-i Houthi sepatem den rarab nung Washington indang-indanga shilem agidaktsütsü merang saka takok mangu. Iran-i yariba Houthis, Saudi Arabia aser Saudi-i yariba Yemen sorkar tsüngta rara nung parnok i indang-indanga teka mesangshitsü, ta US-i shia lir.

Ano jets dak sendakba nung China nungeri itdangitersü ama Washington tebilemtsü akar.

Riyadh den tesendaktep aliba ajanga Beijing-i F-35 technology angutsü akok ta US itdangiter temi tekumdangtsü

ashiba The New York Times nung sangdonga liasü.

Yangji ajemdaker House Intelligence Committee nung Democrat züngsem aser US congressional Representative Raja Krishnamoorthi-ibo tayimtsü ayoktsü memulunger.

Asen itdangiter temia American military technology ya Chinese Communist Party meta küboki aitdaktsütsü ta tekumdangtsü ashiba mapang ka nung asenoki iba mera ya magitsüla, ta Krishnamoorthi-i sangdong ka nung ashi.

Saudi Arabia-i Mecca Agreement nüngja agütsür Pakistan aser Turkiye den taoba ita mutual defense agreement ka zülutepa liasü, koba Washington dak metaloka aliba ajema kuma defence tsütsü kati ka yaritsü asoshi lenmang bushiba indang lir.

Saudi Arabia-i mapang talangka nungi F-35s alinüa liasü, saka Isral nungi ketdangsür temi Riyadh dang ayokba nung tebilemtsü lir ta shia arur. Gulf region nung iba fighter jets ya Israel ket nung dang lir.

Turkiye ya NATO züngsem lir aser linük aika senteper F-35 jets yangluba nung shilem agi, saka parnok i Russia nungi anti-aircraft missiles aliba sülen 2019 küm nungi iba tayimtsü alitsü memelar.

REGD. NO. 351/26
DATE 18/09/2026

नागालैण्ड NAGALAND

AFFIDAVIT

04AA 130039

I, Shri. RENTSAMO PATTON, aged about 64 Years, resident of H.No-163, Duncan Basti Dimapur, Nagaland, do hereby solemnly affirm and declare as follows:

- That I am a citizen of India and an Indigenous inhabitant of Nagaland.
- That, I am the legal and biological father of Mr. KENANIAH PETER PATTON.
- That, in my Son birth certificate, schedule tribe certificate, indigenous certificates and all his other documents his name is entered as KENANIAH PETER PATTON.
- That, whereas in his Aadhar card bearing no- 6105 0195 7209 his name is inadvertently entered and recorded as KENANIAH PETER SYIEM.
- That, this affidavit is made to declare that the names KENANIAH PETER PATTON and KENANIAH PETER SYIEM are my son names.
- That, this affidavit is declared so as to rectify my Son name in his Aadhar Card from KENANIAH PETER SYIEM to KENANIAH PETER PATTON.
- That, henceforth, my son shall use his name as KENANIAH PETER PATTON for all official purposes and references.
- That I do state and verify that the statements made above are true and correct to the best



CTN, Rongjui/Sept. 18 (TYO) : Changtongya Volleyball Association (CVA)-i taküm 14 buba Luke Sasong Memorial Nagaland Open Volleyball Trophy benogo. Parnoki tesüsabuba match nung Savage Setters Volleyball Club Chungtia madak point 25/22, 25/19, 14/25, 28/26 agi koka liasü. MH-10 Kohima aser Longsa Sporting Club na asembuba aser pezübuba jenjang nung liasü.

Nija senpet - Best setter : Sarilepzung (CVA) ; Best spiker: Yongkongtenzuk (CVA) ; aser Player of the tournament : Imtinungba (SSVC Chungtia) parnoki agizük. Takoker kija aser telok nem sen den trophy aser kulikaket agi senpettsü. Iba asayamung ya Mangmetong Kaketshir Telongjem aküm nung Luke Sasong Sporting Club-i ayongzük. Asayamung shibangba aser senpet agütsüba sentong nung Nagaland RD & SIRD Minister, Wb. Metsübo Jamir tetushi tejaoker liasü.

Asian Games: S Korean hockey team atema N Korean anthem temloksü



Kakamigahara city nung Asian Games asayamung nung South Korean asayar nem aibelena North Korean indang national anthem temloksüba mapa.

Nagoya, Rongjui/Sept. 18

(Agencies): Asian Games ayonger temi Hokulbarnü aibelena South Korea teburtem hockey asayatsü lia North Korea indang national anthem temloksüba yong tatok meshitsüsa akum.

Honibarnü Nagoya, Japan nung iba asayamung tenzütsü anogo ka dang lia iba aibelen yagi South Korean ketdangsürtem tali jashidaksü.

Iba asaya sang South Korea-i 5-0 agi Bangladesh akok, saka asaya tenzütsü lia South Korea indang anthem melen North Korea indang anthem tema iba timtem ya ajurua liasü.

South Korea nunger hockey asayartem parnok indang national anthem asoshi adenshia liasü, saka stadium nung parnoki memetetba ken atemba ajanga parnok ratatepa liasü.

Asian Games ayonger temi iba sülen Bangladesh anthem ate maser iba sülen ang South Korea indang anthem ya atem.

Ano anthem tetemdak nunga maneni mangmangtepa liasü. South Korean anthem ya metemzük dang referee-i team anaprong nungi asayartem dang teka salemtepa asayatsü asoshi renemtsü totuyuba

agütsü ta ashir.

Iba sülen stadium announcer kati aibelen asoshi tatok meshi, saka South Korea coach Min Tae-seok-i kanga jashiba lemsatepa liasü.

"Ibai tebilemtsü tulu lir. Onoki anema nokdak dang parnoki tatok meshi aser ibai merenem aliba masü saka atemer-i aibelenba lir ta ashi," ta pai ashi. "Saka iba ya kodanga mataloktsüla."

Iba aibelen jangjatetsü atema bushisüng dang ka tenzükogo, ta South Korean Olympic committee ketdangsür kati ashi.

Anthem bolutepeba ya kisüng masü saka iba asayamung tenzütsü lia shilem agiba team temi parnok anenzük dak tesem tamajung aser mesadem agütsüba indang ashishitepeba agi sünga lir.

Team karbo airport nung ghonda trok tashi atadaksüba osangtema lir.

Ano India tsür gymnast Pranati Nayak aser la indang coach Ashok Mishra na Costa Serena cruise ship nung takdang kasa lezmüksü ta ashi, kong saisaonger nisung 4,000 jungnüa anenzüktsüba lir.

Pranati aser Ashok nati iba asayamung ayonger dangi ao

saka ghonda aika teyari kecha mongutet. Ajisüaka Indian Olympic Association (IOA) ajanga temelen anepalutsü ta ashir.

Iba sülena coach Ashok nem pa dakdang indang sapi agütsütsü minute 45 atatsüsa akum. Ashok ya anepdang 2:00 sülen ang pa indang takdangi ai ta ashir.

Maneni Hokulbarnep Asian Games indang nisan asongba sentong-a menua ghonda ka dak tema atatsüsa akum.

India, Yemen, North Korea, Palestine aser Timor-Leste indang nisan asongba sentong ya minute 20 menur tenzük aser tum nung anenadok ta ashir.

"Menuba atema sasar. Team ka nung timtem lir. Onoki minute 15 nung anepalutsütsü," ta local organizers nungi sangdong ka nung ashi.

Olympic Council of Asia Executive Board aser Organising Committee tsünga osangtsüsang agitepeba majungba yong iba ya atalok, ta ano sangdong ka nung ashi.

20th Asiad ya September 19 nungi opening ceremony agia tenzütsü, saka football, basketball, cricket, soft tennis aser teqball amala saisaonger tenzükatokogo.

India vs Brazil friendly atema sen ajemer ticket 14,000 agütsür

Kolkata, Rongjui/Sept. 18 (Agencies): Brazil den Kolkata nung October 3 nung friendly asayatsü atema All India Football Federation-i tickets 14,000 jenjang tajemba nung agütsür, koba East Bengal, Mohun Bagan aser Mohammedan FC züngsemtem atema alitsü.

India ya September 25 nü Bengaluru nung Panama den asayatsü aser October 3 nü Brazil aser October 6 nü Uruguay den asayatsü atema Kolkata-i meyipa arutsü.

Brehostibarnü Kolkata nung osangbener den jembidang AIFF tir Kalyan Chaubey-i yimti nung akhi mapang nungi aliba clubs asem bhukumer temi jenjang tajemba nung tickets alitsü indang rateta ashi.

"Club kari tickets aginüra, parnoki IFA dang ticket kwi nüngdaker, aji metetdaksütsüla. Mohun Bagan, East Bengal aser Mohammedan Sporting nem ticket ayoktsü atema stadium telungzük nung parnok atema

tesem temeja lezmüksütsü," ta Chaubey-i ashi.

"Yamaji clubs shia züngsem mesüra fans temi indang indanga pei club indang süki bushia oa pei tickets alitetsü. Clubs temi IFA ajanga tickets meshitsü, kobai jenjang tajemba nung tickets lemsatsüba ketdang asütsü," ta pai ashi.

Menden ya goalpost ana tesülen middle tier indang B2 aser D2 sections nung lezmükja lir aser Indian Football Association den affiliate süa aliba clubs nema agütsütsü.

Brazil den asayatsü atema tickets ya general sale nung yokmaba sülen iba mera ya agir, koba sen 999 nungi 15,000 tashi meshir.

Kolkata alema oa ano districts balala nunga gan parks amenoktsyü AIFF-i sentong yanglutar. Iba ya ajanga yimti alema oa academy players lanurtem